

ኢብራዌ አሳስ ፃፊው ኪታ ጋሳ ቆፋ

ሃ ኪታይ ፃፊው፤ ምልቃማ ሜቶይ ጋኪን፤ ባንታ አማኑዋ አጋናው ማቲዳ አማኒያ አሳሳ። ሃ ማፃፋ ፃፊው፤ ዮሱስ ኪሪስቶሲ ወርሴላኔ ቱማ ያሳ ቆንጩሳ ጊዴይሳ ኢብራዌ አሳስ ቤሴስ። ሄ አማኒያ አሳይ ባንታ አማኑዋን ሚናና ሜላ ኤንታ ሚንሴሴስ። ኢ ሄሳን ሄዥ አይፌ ቆፋታ ዋናዬዲ ቤሴስ።

1. ዮሱሲ ባ ኤኪዳ ሜቱዋን አዋስ ቱማ ኪቴቲዳ ሜሪና ያሳ ናዓ። ኢ ያሳ ናዓ ጊዲዳ ጊሾ ጋልዓ ጫቁዋ ዎዴ ዴዲያ ናቤታፕ። ኪታንቾታፕኔ ሙሴፕ ቦላ።
2. ዮሱሲ ጋልዓ ጫቁዋ ካሂንታፕ ዳሮ አዲያ ሜሪና ካሂኔ ጊዴይሳ ያሳይ ባ ሁዲን ማርካቲስ።
3. ዮሱሳ ባጋራ አማኒያ አሲ ናጋራፕ። ያሻፌኔ ሃይቆፕ አቴስ። ዮሱሲ ካሂኔ ሃሳቃ ጊዴይሳዳ፤ ካሴ ኢብራዌታ አማኖ ምጋኒኔ ሜሄ ያርሾን ኩያዳ ቤንቲያ አቶቴሳ ሃዲ ቱማ አሲስ።

ፃፊው ኢስራኤል አሳ ታሪኪን ዳሮ ኤሬቲዳ አሳ አማኖ ሴሚሶ አሲ ኤኪዲ (ሼም 11) ሃ ማፃፋ ናባቢያ አሳቲ ባንታ አማኑዋን ሚናና ሜላ አኪኪሴስ። ሄሳዳካ፤ ሼም 12 ናባቢይሳቲ ባንታ አይሬያ ዮሱሳ ቦላ ምሲዲ፤ ባንታ አማኑዋን ሚናና ሜላኔ አይ ሜቶይኔ ዋዬይ ጋኪኮካ፤ ኤንቲ ጌንጫና ሜላ ዞሬስ። ወርሴላን ዞሬኒኔ አኪኪሶ ቃላን ባ ኪታ ኩዮስ።

ኢብራዌ ኪታ አይፌ ቆፋታ

- ጌሎ ቆፋ፡ ያሳይ ኪሪስቶሳን ቆንጩዳይሳ 1:1-3
- ኪሪስቶሲ ኪታንቾታፕ ቦላ 1:4-2:18
- ኪሪስቶሲ ሙሴፕኔ ኢያሱፕ ቦላ 3:1-4:13
- ኪሪስቶሳ ካሂኔቴሳይ ቦላ 4:14-7:28
- ኪሪስቶሳ ጫቆይ ቦላ 8:1-9:22
- ኪሪስቶሳ ያርሾይ ቦላ 9:23-10-39
- አማኖ ባይራቴሳ 11:1-12:29
- ያሳ ኡፋይሶ 13:1-19
- አንጀኔ ኩሻ ቆፋ 13:20-25

ናዓይ ኪታንቾታፕ ቦላ

¹ ካሴ ያሳይ፤ ኑ አዋታስ ናቤታ ባጋራ ዱማ ዱማ አጌን ዳሮ ምዴ አዲስ። ² ሺን ሃ ወርሴላ ምዲያን ኡባ ኢያ ላቲሲዳ ቃሲ

አላሚያ ኢያ ባጋራ ሜዲያ ባ ናዓ ባጋራ ኑስ አዲስ። 3 ናዓይ ያሳ ቦንቹዋ ጳሌሳኔ ኩሜሳ ያሳ ያሳቴሳ ኤኪዲ፥ ባ ዎልቃማ ቃላን ሃ አላሚያ ካቲሲዲ አይኪስ። አሳ ኤንታ ናጋራፔ ጌሺዳፔ ጉዩ ኡባፌ ቦላ ያሳ ኡሻቻ ባጋን ሳሉዋን ኡቲስ።

4 ኢያው ኢሜቲዳ ሱንሳይ ኪታንቾታ ሱንሳፌ ቦላ ጊዴይሳዳ ኢ ኤንታፌ ቦላ። 5 ሂዛ፥ ያሳይ ኪታንቾታፔ አዴኮ፥

«ኔኒ ታ ናዓ፤

ታ ሃቺ ኔው አዋ ጊዳስ» ጊዴ?

ዎይኮ ቃሲ አዴኮ፥

«ታኒ ኢያው አዋ ጊዳና፤

ኢካ ታው ናዓ ጊዳና» ጊዴ?

6 ቃሲ ያሳይ ባ ባይራ ናዓ ሃ አላሚያ ኪቲሼ፥

«ያሳ ኪታንቾቲ ኡባይ ኢያው ጎይኖ»

ያጊስ። 7 ያሳይ ኪታንቾታባ አዲሼ፥

«ያሳይ ባ ኪታንቾታ ጫርኮ፥

ባ አይሌታ ታማ ሳጮ አሴስ»

ያጊስ። 8 ሺን ባ ናዓባ አዲሼ፥

«ያሳው፥ ኔ ካዎቴሳይ ሜሪናው ዴዔስ።

ኔ ካዎቴሳ ኔ ሂሎቴሳን አይሳሳ።

9 ኔኒ ሂሎቴሲ ዶሳዳሳ፤ ኢታ ኢፃዳሳ።

ያሳይ፥ ኔ ጎዳይ፥ ኔና ኔ ላጌታፔ አሲዲ ዶሪስ፥

ኡፋይሳ ዛይቴ * ኔና ቲዩስ»

ያጊስ። 10 ያሳይ ዛሪዲ፥

«ጎዳው፥ ኮይሮ ኔኒ ሳዓ ሜዳዳሳ፤

ሳሎቲ ኔ ኩሼ አሶ።

11 ሄሳቲ ኡባይ ዳያና፤

ሺን ኔኒ ዳና።

ኤንቲ ኡባይ አፊላዳ ወራና።

12 ኔኒ ኤንታ ሳሌናዳ ፃፃና፤

ቃሲ ኤንቲ አፊላዳ ሳሜታና።

ሺን ኔኒ ኡባ ዎዴ ኔና፤

ኔ ላይሳይካ ወራና»

ያጊስ። 13 ሺን ያሳይ ኪታንቾታፔ አዴኮ፥

«ታኒ ኔ ዋርኬታ ኔ ቶሆይ

ዩዲያሶ አላና ጋካናው፥

1:5 ማዝ 2:7፤ 2ሳሙ 7:14፤ 1ታሪ 17:13 1:6 ዛሬ 32:43 1:7 ማዝ
104:4 1:8 ማዝ 45:6-7 * 1:9 ኡፋይሳ ዛይቴ፥ ኢ ካዎቴያ ዎዴ አሳይ
ኡፋይሳን ኢሊሊዲ ኢያ ካዎሴይሳ ቤሴስ። 1:10 ማዝ 102:25-27

ሃይሳን ታፔ ኡሻቻ ባጋን ኡታ» ጊዴ?

¹⁴ ኪታንቾቲ ኡባይ አቶቴሲ ዴማናው ዴዲያ አሳታ ማዳናው ያሳይ ኪቲዳ አያናታ ጊደኮናዬ?

2

ጊታ አንጃዋ

¹ ሄሳ ጊሾ፣ ኑኒ ሲዲ ዳ ቱማፔ ሃራሶ ኤኬቶና ሜላ ሄ ሲዲ ዳይሳ ሚንሲዲ ናጋናው ቤሴስ። ² ሂዛ፣ ኪታንቾታ ባጋራ አዴቲዳ ቃላይ ቱማ ጊዲኮ፣ ኢያ ናቆይኔ ኪቴቶና ኢያይ ፐርዳ ኤሂያባ ጊዲኮ፣ ³ ያቲን፣ ኑኒ ሃይሳ ሜላ ጊታ አቶቴሳ ኢፃስ ጊኮ፣ ዋኒዲ አታኔ? ኮይሮ ጎዳይ ባ ሁዔን ሄ አቶቴሳ አዲስ፤ ቃሲ ኢያፔ ሲዲ ዳይሳቲ ኑስ ጊሺዲ ማርካቲዶሶና። ⁴ ቃሲ ያሳይ ማላታታን፣ አራሳባታን፣ ዱማ ዱማ ማላታኒኔ ባ ሺኒያዳ ኢሚዳ ጊሻ አያና ኢሞታታን ማርካቴሳ ሚንሲስ።

ዮሱሲ አሴ ጊዲስ

⁵ ያሳይ ሃ ኑኒ አዲያ ሲንሳፌ ያና አላሚያ፣ ኪታንቾታስ ሃሪሲቤና። ⁶ ጊሻ ማፃፋይ ኢሲ ቤሳን ሃይሳዳ ያጌስ፡ «ኔኒ አሳስ ቆፓናው አሲ አይቤ?

ዎይኮ ኔኒ ኢያ ናጋናው ኢ አይቤ?

⁷ ኔ ኢያ ኪታንቾታፔ ጉሳ ዎዴስ ጉሳዳሳ፤

ኢያ ሁዔን ቦንቾኔ ሳባ ካላቻ ዎሳዳሳ።

⁸ ቃሲ ኡባባ ኢያ ቶሁዋፔ ጋርሳን ዎሳዳሳ»

ያጌስ። ያሳይ ኡባባ ኢያው ሃሪሲያ ዎዴ ኢያው ሃራቲቦናባይ አይቤካ ባዋ። ሺን ሃዒ ኡባባይ ኢያው ሃራቲሺን ኑኒ ቤዒቦኮ።

⁹ ሺን ኑኒ ኪታንቾታፔ ጉሳራ ጉዲዳ ዮሱሳ ቤዎስ። ያሳ አዶ ኪሃቴሳ ጋሶን ዮሱሲ አሳ ኡባስ ሃይቂስ። ኢ ዋዬ ሃይቆ ሃይቂዳ ጊሾ ቦንቾኔ ሳባ ካላቻ ኢያ ሁዔን ዎሲስ። ¹⁰ ኡባባይ ኢያውኔ ኢያ ጋሶን ሜዴቲዳ ያሳይ፣ ዳሮ ናይታ ባራ ቦንቾሳናው ኤንታ አቶቴሳ ሁዲያ፣ ዮሱሳ ዋዬን ፖሎ አሳናው ኢያው ቤሴስ።

¹¹ ዮሱሲኔ ሄ ኢ ጊሺዳ አሳ ኡባይ ኢሲ አዋ ናይታ። ዮሱሲ ኤንታ፣ «ታ ኢሻታ» ጊዲ ዪጋናው ዮላቶናይ ሄሳሳ። ¹² ዮሱሲ፣ «ታኒ ኔ ሱንሳ ታ ኢሻታስ አዋጃና፤

ዴሪያ ሺቁዋን ኔና ጋላታና»

ያጌስ። ¹³ ቃሲ ኢ፣ «ታኒ ታ አማኑዋ ኢያ ቦላ ዎሳና» ቃሲካ፣ «ያሳይ ታው ኢሚዳ ናይታራ ታ ሃይሳን ዴዳይስ» ያጌስ።

1:13 ማዝ 110:1 2:6 ማዝ 8:4-6 2:12 ማዝ 22:22 2:13 ኢሳ 8:17-18

14 ናይቲ አሾይኔ ሱሲ ዴዔይሳታ ጊዲያ ጊሾ ዩሱሲካ ኡንታዳ አሴ ጊዲስ። ኢ ሄሳ አሲዳይ፣ ሃይቆ ቦላ ዎልቂ ዴዒያ ሃላሂያ ባ ሃይቁዎን ዳይሳናሳ። 15 ቃሲ ባንታ ዴዎ ላይሳ ኡባን ሃይቆ ያሻን አይሌቲዲ ዴዔይሳታ አይሌቴሳፌ ዎዛናሳ።

16 ቱማ ዩሱሲ ዩዳይ አብራሃሜ ዜሬሲ ማዳናሳፌ አቲን ኪታንቸታ ማዳናሳ ጊዴና። 17 አሳ ናጋራይ አቶ ጌቴታና ሜላ ያሳ ሲንላን ማሪያኔ አማኔቲዳ ካሂኔ ሃላቃ ጊዲስ። ሄሳ ጊሾ፣ ኢ ኡባባን ባ ኢሻታ ዳናናው ቤሴስ። 18 ኢ ባ ሁዔን ፓጩን ዎዩቲዳ ጊሾ ፓጩቴይሳታ ማዳናው ዳንዳዔስ።

3

ዩሱሲ ሙሴፔ ቦላ

1 ሄሳ ጊሾ፣ ያሳይ ዪጊዳ ጊሻ ኢሻቶ፣ ኑ አማኖን ጎዳ ጊዲ ዪጊያ ሃዎሪያኔ ካሂኔ ሃላቃ ዩሱሳ ቤዒቴ። 2 ሙሴይ ያሳ ኬላ ኡባን አማኔቲዳይሳዳ ዩሱሲካ ባና ዶሪዳ ያሳስ አማኔቲዳይሳ። 3 ኬሴ ኬዪይሲ ኬላፌ አዲዲ ቦንቼቴይሳዳ ዩሱሲ ሙሴፔ አዲያ ቦንቸ ኤካናው ቤሴስ። 4 ኢሲ ኢሲ ኬላ ኬዪዳ አሲ ዴዔስ፣ ሺን ኡባ ጊጊሲዳይ ያሳ። 5 ሙሴይ ያሳ ኬላ ኡባን አማኔቲዳ አይሌ ጊዲዲ፣ ያሳይ ሲንላፌ ጋናባስ ማርካ ጊዲስ። 6 ሺን ኪሪስቶሲ ያሳ ኬላን ናዓዳ አማኔቲዳይሳ። ኑኒ ኤካና ጊዲ ናጊያ ኡፋይሳ ሚንሲዲ ናጊኮ ያሳ ኬሲ ጊዶስ።

ያሳ አሳስ ዴዒያ ሹምፑዎ

7 ሄሳ ጊሾ፣ ጊሻ አያናይ ጌይሳዳ፣
«ሃቺ ሂንቴ ያሳይ ጌይሳ ሲዒያ ዎዴ
8 ባዞ ቢታን ፓጩያ ጋላስ፣
ሂንቴ አዎቲ ማካሊዳይሳዳ፣
ሂንቴ ዎዛና ሚንሶፊቴ።
9 ሂንቴ አዎቲ ታና ፓጩዶሶና፤
አይታሙ ላይሲ ታ አሱዎ ቤዒዶሶና።
10 ሄሳ ጊሾ፣ ታ ሄ ዩሌቴላ ሃንቁታዳ፣
«ኤንቲ ኡባ ዎዴ ባንታ ዎዛናን ባሎሶና፤
ታ አጊያ ኤሪቦኮና» ያጋስ።
11 ሄሳ ጊሾ፣ ታኒ ታ ሃንቁዎን ጫቃዳ፣
«ታ ሹምፖ ቤሳ ኡባካ ጌሎኮና» ያጋስ።
ያጌስ።

12 ታ ኢሻቶ፥ ሂንቴፌ አደንካ፥ ዴያ ያሳፌ ሂንቴና ሻኪያ ኢታኔ አማኖና ዎዛኒ ዶና ሜላ ናጌቲቴ። 13 ሂንቴፌ አናካ ናጋሪ ባሌሲን፥ ባ ዎዛና ሚንሶና ሜላ «ሃቺ» ያጌቲዲ ዩጌቲሺን ጋላስ ጋላስ ኢሶይ ኢሱዋራ ዞሬቲቴ። 14 ኑ ኮይሮ አማኑዋ ኑኒ ወርሴሲ ጋካናው ሚንሲዲ ናጊኮ፥ ኪሪስቶሳራ ኢሲፌ ላታና። 15 ጌሻ ማፃፋን፥

«ሃቺ ያሳይ ጌይሳ ሂንቴ ሲዲያ ዎዴ ሄ ዎዴ ኤንቲ ማካላቴሳን ሃኒዳይሳዳ፥ ሂንቴ ዎዛና ሚንሶፊቴ» ያጊስ።

16 ያሳይ ጊያባ ሲዲዲ ማካሊዳይ አኔ? ሙሴይ ጊብዩፌ ካሌሲ ኪሲዳ ኡባ ጊዶኮናዩ? 17 ያሳይ አይታሙ ሳይሲ አና ሃንቁቲዴ? ናጋራ አሲዳይሳታኔ ኤንታ አሃይ ባዞ ቢታን ዎዲ አቲዳ አሳታ ጊዶኮናዩ? 18 ቃሲ ያሳይ፥ «ታ ሼምፖ ቤሳ ጌሌኬታ» ያጊዲ ጫቂዳይ፥ ኢያው ኪቴቶና ኢዲዳ አሳፔ አቲን አዴሴ? 19 ሂዛ፥ ኤንቲ ሄ ሼምፖ ቤሳ ጌሎና አቲዳይ አማኒቦና ጊሾ ጊዴይሳ ኑ ቤያስ።

4

1 ሂዛ፥ ያሳይ ኑና ባ ሼምፖ ቤሳ ጌልሳና ጊዳ ቃላይ ቡሮ ሲንሳፌ ዴዲያ ጊሾ ሂንቴፌ አኒካ ሄ ሼምፖ ቤሳ ጌሎና አቶና ሜላ ናጌቶስ። 2 ኤንታው ዎንጊላይ ሳባኪቲዳይሳዳ፥ ኑስካ ሳባኪቲስ። ሺን ኤንቲ ሲዲዳባ አማኒዲ ኤኪቦና ጊሾ ኤንታ ጎጫቤና። 3 ጊዶሺን፥ አላሜይ ሜዴቶሳፔ ዶሚዲ ያሳ አሶይ ፖሌቲዳይሳ ጊዲኮካ፥ ያሳይ፥

«ታኒ ታ ሃንቁዋን ጫቃዳ፥ ታ ሼምፖ ቤሳ ኡባካ ጌሎኮና»

ጊዳይሳዳ፥ ኑኒ አማኒዳይሳቲ ኢያ ሼምፖ ቤሳ ጌላና። 4 ሳፑንሳ ጋላሳባ ኢሲ ቤሳን፥ «ያሳይ ሳፑንሳ ጋላሳን ባ አሶ ኡባፌ ሼምፐስ» ያጊስ። 5 ቃሲካ ሄ ቤሳን፥ «ኤንቲ ታ ሼምፖ ቤሳ ኡባራካ ጌሎኮና» ያጊስ። 6 ኮይሮ ዎንጊላ ሲዲዳይሳቲ ኪቴቶና ኢዲዲ ሼምፖ ቤሳ ጊሊቦኮና። ያኒያ ጊሾ፥ ሃዲካ ሄ ሼምፖ ቤሳ ጌላና ኢሲ ኢሲ አሳቲ ዴያሶና። 7 ሄሳ ጊሾ፥ ያሳይ፥ «ሃቺ» ጊዲ ዩጊሼ ኢሲ ጋላስ ኑስ ቃንዲስ። ዳሮ ዎዴፔ ጉዩ ያሳይ ዳዊቴ ባጋራ፥ «ያሳይ ጊያባ ሃቺ ሂንቴ ሲዲያ ዎዴ

ሂንቴ ዎዛና ሚንሶፊቴ»

3:15 ማዝ 95:7-8 3:16 ታይ 14:1-35 4:3 ማዝ 95:11 4:4 ሜዴ 2:2 4:5 ማዝ 95:11

ያጊዲ አዲስ። 8 ኢያሱይ ኤንታው ሽምጥዋ ኢሚዳባ ጊዲያኮ፥
 ያሳይ ሃራ ጋላሳባ ጉዩፔ አደናሺን። 9 ሂዛ፥ ያሳ አሳስ ሳምባታ
 ሽምጥይ ናጌቲዲ ደዔስ። 10 ያሳ ሽምጥ ቤሳ ጌሊያ አኒካ፥ ያሳይ
 ባ አሱዋፔ ሽምጥዳይሳዳ ኢካ ባ አሱዋፔ ሽምጥና። 11 ሄሳ ጊሾ፥
 አኒካ ሄ አሳ ኪቴቴላ ኢፁዋ ካሊዲ፥ ኩንዶናዳ ያሳ ሽምጥ ቤሳ
 ጌላናው ሚኖስ።

12 ያሳ ቃላይ ደዎይ አሴይሳ፥ ናምፁ ባጋራ ቃራቲዳ ማሻፌ
 አዲዲ አጮ። ኢ ሽምጥ፥ አያና፥ ፃጰኔ ኮሊዜ ጋካናው ካንሲዲ
 ጫደስ። ቃሲ አሳ ዎዛናን ደዒያ ጌሚዳ ቆፋ፥ አሙዋ ሻኪዲ
 ፒርደስ። 13 ያሳ ሲንሳፌ ቆሴቲያባይ አይባ ሜዴቴሲካ ባዋ። ኢያ
 አይፌ ሲንሳን ኡባባይ ቆንጩኔ ካሎ ደዔስ። ኑኒ ዛሮ ኢማናው
 ቤሴይ ኢያ ሲንሳና።

ጊታ ካሂኔ ሃላቃ ዩሱሳ

14 ሂዛ፥ ሳሎ ከዪዳ ጊታ ካሂኔ ሃላቃይ፥ ያሳ ናዓይ ዩሱሲ፥
 ኑስ ደዒያ ጊሾ ኑ አማኑዋ ሚንሲዲ ናንስ። 15 ኑ ካሂኔ ሃላቃይ
 ኑ ዳቡሪያ ዎዴ ኑስ ቃዴታናው ዳንዳዔይሳ። ኢ ናጋራ አሲቤና፥
 ሺን ኑዳ ኡባባን ፓጩቲስ። 16 ሂዛ፥ ማሮቴላ ኤካናውኔ ማዴ
 ኮሺያ ዎዴ አዶ ከሃቴላ ደማናው አዶ ከሃቴላይ ደዒያሱዋ ያሳ
 አራታኮ ያዮና ሺቆስ።

5

1 ኢሲ ኢሲ ካሂኔ ሃላቂ አሳ ጊዶፌ ዶሬቲዲ፥ ያሳራ ጋሲያባን
 አሳ ጊሾ ኢሞታኔ ናጋራ ያርሾ ያርሻናው ሹሜቴስ። 2 ኢ ባ ሁዔን
 ዳቡራንቾ ጊዲያ ጊሾ ኤሮናይሳታሲኔ ባሌይሳታስ ቃዴታናው
 ዳንዳዔስ። 3 ኢ ባ ናጋራ ጊሾኔ አሳ ኡባ ናጋራ ጊሾ ያርሾ
 ያርሻናው ቤሴይ ሄሳሳ።

4 አኒካ ሃ ቦንቹዋ ባው ኤካናው ዳንዳዔና፥ ሺን አሮኒ ካሂኔ
 ሃላቃ ጊዳናው ዩጌቲዳይሳዳ ያሳን ዩጌታናው ቤሴስ። 5 ሄሳዳካ፥
 ኪሪስቶሲ ካሂኔ ሃላቃ ጊዲያ ቦንቹዋ ባው ኤኪቤና። ሺን ያሳይ
 ኢያ፥

«ኔኒ ታ ናዓ።

ሃቺ ታ ኔው አዋ ጊዳስ»

ያጌስ። 6 ቃሲ ሃራሶን፥

«ማልኪዳቂይ ካሂኔ ጊዲዳይሳዳ፥

ኔኒ ሜሪናው ካሂኔ ጊዳና»

4:7 ማዘ 95:7-8 4:8 ዛሬ 31:7፤ ኢያ 22:4 4:10 ሜዴ 2:2 5:3
 ሌዌ 9:7 5:4 ኪሳ 28:1 5:5 ማዘ 2:7

ያጌስ።

7 ዩሱሲ አሴ ጊዲዲ ሃ አላሚያን ዴዲያ ዎዴ ባና ሃይቆፔ አሻናው ዳንዳዲያ ያሳ ዳሮ ዩሆኒኔ አፉሳን ዎሲስ። ኢ፥ ኢያ ቦንቺዲ ኪቴቲዳ ጊሾ ያሳይ ኢያ ዎሳ ሲዲስ። 8 ዩሱሲ ያሳ ናዓ ጊዲኮካ ባ ዋዩቲዳ ዋያን ኪቴቴሲ ታማሪስ። 9 ሄሳንካ፥ ዩሱሲ ባ አሱዋ ፖሊዳፔ ጉዩ ባው ኪቴቲያ ኡባይ ሜሪና አቶቴሳ ዴማና ሜላ ጋሶ ጊዲስ። 10 ያሳይ ማልኬዓዲቄ ሹሚዳይሳዳ ካሂኔ ሃላቃ አሉዲ ኢያ ሹሚስ።

አማኑዋን ዳቡሮና ሜላ ኢሜቲዳ ናጊሶ

11 ሃ ኑ አዳ ቦላ ጉጂ ሃሳያናባይ ዳሮባይ ዴዴስ፥ ሺን ሂንቱ አከካይ ጉላ ጊዲያ ጊሾ ሂንቴው አዲ ጌልሳናው ዋይሴስ። 12 ሂንቱ ሃናዴ አስታማሬ ጊዳናው ቤሴስ፥ ሺን ያሳ ቃላ ኮይሮ ቲሚርቲያ ሂንቴና ዛሪ ታማርሲያ ሃራ አሲ ኮሼስ። ሂንቱ ሚኖ ካሲ ማናው ዳንዳዎና ጊሾ ማሲ ኮሼስ። 13 ማሲ ፓሄቲያ አኒካ ዮጋ ናዓ ጊዲያ ጊሾ ሎዎኔ ኢታ ሻኪ ኤሬና። 14 ሺን ሚኖ ካሲ ሎዎኔ ኢታ ሻኪዲ ኤሪያ ካሃማ አሳሳ።

6

1 ሂዛ፥ ኪሪስቶሳባ ታማርሲያ ኮይሮ ቲሚርቲያ አጊዲ ኪሪስቶሳን ካሃማቴሳኮ ቦስ። ሃይቆ አሶፔ ሲሞባኔ ያሳ አማኖባ ኮይሮ ቲሚርቲያኮ ጉዩ ሲሞኮ። 2 ሄሳዳካ፥ ዒንቃቴታባ፥ * ኩሼ ዎሶባ፥ ሃይቆፔ ዴንዶባኔ ሜሪና ፒርዳባ ዛሪ ታማሮኮ። 3 ያሳይ ጊኮ ኑ ሄሳ አሳና።

4 ኢሲ ቶሆ ፖዎይ ፖዲዳይሳታ፥ ሳሎ ኢሞታ ኤኪዳይሳታ፥ ጌሻ አያናን ሻኪቲዳይሳታ፥ 5 ሎዎ ያሳ ቃላኔ ሲንሳፌ ያና አላሚያ ዎልቃ ቤዲዳይሳታ፥ 6 ጉዩፔ ካዲዳይሳታ ናጋራፔ ናምዓንሶ ዛራናው ዳንዳዔቴና። አይስ ጊኮ፥ ኤንቲ ባንታ ዳዩዋስ ያሳ ናዓ ዛሪ ካቂያ ሜላ ማስቃሊያ ቦላ ኢያ ካቆሶናኔ አሳ ሲንሳን ካወሾሶና።

7 ኡባ ዎዴ ኢ ቦላ ቡኪያ ኢራ ኡያዳ፥ ጎዩዳ ኡራ ማዲያ ካሲ ኢሚያ ቤቲያ ያሳን አንጄቲዳሮ። 8 ሺን አጉንሱኔ ኪንቾቴ ዶሊያ ቤቲያ አይቢባካ ማዱኩ፤ ኢው ቃንጌሳይ ማታቲስ፤ ወርሴሳን ፁጌታና።

5:6 ማዝ 110:4 5:7 ማቶ 26:36-46፤ ማር 14:32-42፤ ሉቃ 22:39-46
5:12 1ቆሮ 3:2 * 6:2 ዒንቃቴታባ፥ ሃ ቤሳን ዒንቃቴታባ ጌቴቲዳይ ዱማ ዱማ ጊሾ ዎጋታባ አዳናሳ፥ 6:8 ሜዴ 3:17-18

9 ኑ ሲቆ ኢሻቶ፥ ኑኒ ሃይሳዳ አዲያባ ጊዲኮካ፥ ሂንቴና አቶቴሳኮ ካሌሲያ ሎዎባይ ሂንቴው ዴዔይሳ ኤርሰ። 10 ዎሳይ ሱሬ ፐርዴይሳ። ዎሳይ፥ ሂንቴ አሲዳ አሱዋኔ ካሴ ጊዲን ሃዒካ አማኔይሳታ ማዲዲ፥ ኢያው ዴዒያ ሲቁዋ ቤሲዳይሳ ዶጊና። 11 ሂንቴ ኡባይ ኡፋይሳን ናጊይሳ ዴማና ጋካናው ሃ ማኖቴሳ ዉርሴሲ ጋካናው ቤሳና ሜላ ኑ አሞቶስ። 12 ሂንቴ አማኖኒኔ ዳንዳግን ናጊያ ኡፋይሳ ላቲያ አሳ ዳናና ሜላፔ አቲን አዛላ ጊዳና ሜላ ኮኮ።

ዎሳይ ኢሚዳ ኡፋይሳይ ሲዲሴና

13 ዎሳይ አብራሃሜስ ኢማና ጊዲ ጫቂዳ ዎዴ ባፔ አዲያ ሃሪ ጊቲ ባይና ጊሾ ባ ሁዔን ጫቂስ። 14 ኢያኮ፥ «ታኒ ኔና አንጃና፤ ኔ ዜሬሳካ ዳርሳና» ያጊስ። 15 አብራሃሜይ ዳንዳግን ናጊዲ ዎሳይ ኢማና ጊዳ ኡፋይሳ ኤኪስ።

16 ኢሲ ጫቂሼ ባፔ ጊታቲያ ኡራን ጫቂስ፤ ሄ ጫቆይ ጌቴቲዳባ ሚንሲዲ፥ ፓላማ ኡባ ቴቂስ። 17 ሄሳ ጊሾ፥ ዎሳይ ባ ላሜቶና ቆፋ ኡፋይሳ ቃላ ላቴይሳታስ ቆንጨሳናው ኮዬዳ ጊሾ ጫቆን ሚንሲስ። 18 ዎሳይ ዎርዶቴና፥ ኢያ ኡፋይሳ ቃላይኔ ጫቆይ፥ ናምዳይካ ላሜቶኮና፥ ሃ ናምዑባታን ኑ ሲንሳን ዴዒያ ኡፋይሳ አይካናው ዳናዳግና ሜላ ጌሼ ዴማናው ኢያኮ ባቃቲዳ ኑኒ፥ ዎልቃማ ሚንሴሶ ዴማና።

19 ሃ ኡፋይሳይ ኑ ሽምፑዋስ፥ ማርካቤይ ቃዎናዳ ሚንሲዲ አይኪያ ቢራታ ሜላ። ሄ ኡፋይሳይ ማጋራጃዋፌ ጉዬ ባጋን ዴዒያ ጌሻ ቤሳ ጌሊስ። 20 ዩሱሲ ማልኬግዲቁ ሹማቴሳዳ ሜሪናው ካሂኔ ሃላቃ ጊዲዲ፥ ኑ ጊሾ ኑፔ ሲንሳቲዲ ሄ ቤሳ ጌሊስ።

7

ካሂኒያ ማልኬግዲቁ

1 ማልኬግዲቁይ፥ ሳሌሜ ካዎይ፥ ኡባፌ ቦላ ዎሳ ካሂኔ። ሄ ማልኬግዲቁይ አብራሃሜይ ካዎታ አሊ ዎኒዲ ሲሚሺን ኢያራ ጋሄቲዲ ኢያ አንጃስ። 2 አብራሃሜይ ባ ዲዒዳባ ኡባፌ ኢያው አስራታ ኬሲዲ ኢሚስ። ማልኬግዲቁ ሱንሳይ ኮይር «ጊሎቴሳ ካዎ»፥ ናምዳንሶ፥ «ሳሌሜ ካዎ» ቢርሼሳይ፥ «ሳርቴሳ ካዉዋ» ጉሱ። 3 ማልኬግዲቁስ አያ ዎይኮ አዉ ዎይኮ ዛሬ ፓይዶይ ባዋ። ኢያ ዩሌቴሳስ ዶሜሲ ዎይኮ ኢያ ዴዑዋስ ዉርሴሲ ባዋ፥ ሺን ዎሳ ናዓ ዳኒዲ ሜሪናው ካሂኔ ጊዲስ።

6:14 ሜዴ 22:16-17 6:19 ሌዌ 16:2 6:20 ማዝ 110:4 7:1 ሜዴ 14:17-20

4 ማልኬዓዲቄይ አይ ሜላ ጊቱኮ ቤዒቱ። ኑ አዋታ ማይዛይ፥ አብራሃሜይ፥ ባ ዴዒዳባፕ ኢያው አስራታ ኢሚስ። 5 ካሂኔ ጊዲያ ሌዌ ዛሬይ ኢስራዔል አሳፕ፥ ሄሲካ አብራሃሜ ዜሬሲ ጊዲዳ ባንታ ኢሻታፕ አስራታ ኤካና ሜላ ሂጌይ ኪቴስ።

6 ማልኬዓዲቄይ ሌዌ ዛሬ ጊደና ኢዲኮካ አብራሃሜፕ አስራታ ኤኪስ፤ ኡፋይሳ ቃሊ ዴዒያ አብራሃሜ አንጂስ። 7 ጉላይ ጊታን አንጂቴይሲ ፓላንሴና።

8 ኢሲ ባጋራ፥ አስራታ ኤኬይሳቲ ሃይቄያ አሳታ፥ ሺን ሃራ ባጋራ አስራታ ኤኬይሲ ዴዎን ዴዔስ ያጊዲ አዴቲዳይሳ። 9 ሂዛ፥ አስራታ ኤኪያ ሌዌይ፥ አብራሃሜ ባጋራ አስራታ ኢሚስ ጋናው ዳንዳዔቴስ። 10 አይስ ጊኮ፥ ማልኬዓዲቄይ አብራሃሜራ ጋሄቲያ ዎዴ ሌዌይ ዩሌቲሶናባ ጊዲኮካ፥ ባ ማይዛ አብራሃሜ ጉልባታን ዴዔስ።

11 ኢስራዔል አሳስ ሂጌይ ሌዌ ካሂኔቴላ ባጋራ ኢሜቲስ። ሃ ሌዌ ካሂኔቴላይ ፖሎ ጊዲዳባ ጊዲያኮ አሮናይሳ ሜላ ጊደናሺን፥ ማልኬዓዲቄ ሜላ ሃራ ካሂኔ ሹማናው አይስ ኮሺዴ? 12 ሂዛ፥ ካሂኔቲ ላሜቲያ ዎዴ ሂጌይካ ቃሲ ላሜታናው ቤሴስ። 13 ሃ ኑ ኢያባ አዲያ ኡራይ ሃራ ዛሬ፤ ኢያ ሺሻፕ አኒካ ያርሾ ቤሳን ካሂኔቴላን አሲቤና። 14 ኑ ጎዳይ ዩሁዳ ሺሻፕ ዩዳይሲ ኤሬቲዳይሳ። ጊደሺን፥ ሙሴይ ካሂንቴባ አዲሼ ዩሁዳ ዛሪያባ አይባካ አዲቤና።

15 ማልኬዓዲቄ ሜላ ሃራ ካሂኔይ ዩዳባ ጊዲያኮ ሃ ኑ አዲያባይ አዲ ቆንጫና። 16 ኢ ካሂኔ ጊዲዳይ ዳዮና ዴዑዋ ዎልቃናፕ አቲን ኢያ ማይዛ ሂጌኒኔ ዎጋን ጊዴና። 17 ጌሻ ማፃፋይ፥

«ማልኬዓዲቄ ካሂኔቴላ ሜላ፥

ኔኒ ሜሪናው ካሂኔ»

ያጊዲ ማርካቴስ። 18 ኮይሮ ሂጌይ ዳቡራንቾኔ ማዶናባ ጊዲያ ጊሾ ሻሬቲስ። 19 ሙሴ ሂጌይ አይቤንካ ፖሎ አሳናው ዳንዳዒቤና። ሺን ኑኒ ኢያ ባጋራ ያሳኮ ሺቄያ ኡባፌ አዲያ ኡፋይሳ ቃላይ ኑስ ኢሜቲስ።

20 ኪሪስቶሲ ካሂኔ ጊዲያ ዎዴ ያሳይ ጫቂስ፥ ሺን ሃራቲ ካሂኔ ጊዲዳ ዎዴ ሄሳ ሜላ ጫቆይ ባዋ። 21 ሺን ዩሱሲ ጫቆን ካሂኔ ጊዲስ። ያሳይ ያጊዲ ጫቂስ፤

«ጎዳይ ጫቂስ፤ ኢ ባ ቆፋ ላሜና፤

«ኔኒ ሜሪና ካሂኔ»

ያጊስ። 22 ሃ ጫቂዋ ጋሶን ዩሱሲ ኑስ ኡባፌ አዲያ ቃላ ጫቂዋስ ዋሴ ጊዲስ።

7:5 ታይ 18:21 7:17 ማዝ 110:4 7:21 ማዝ 110:4

23 ካሂኔቴላን አሶና ሜላ ሃይቆይ ኤንታ ዲጊዳ ጊሾ ኮይሮ ካሂኔታ ታይቦይ ዳሮ። 24 ሺን ዮሱሲ ሜሪናው ዴዲያ ጊሾ ኢያ ካሂኔቴላ ሃሪ ላቴና። 25 ሄሳ ጊሾ፣ ኢ ኡባ ዎዴ ኤንታ ጊሾ ጋናታናው ሜሪናው ዴዲያ ጊሾ ያሳኮ ኢያ ባጋራ ዮይሳታ ፖሎ አሻናው ዳንዳዔስ።

26 ሂዛ፣ ኑስ ኮሺያባ ኢሚያ፣ ጌሻይ፣ ቦሬይኔ ቱኒ ባይናይሲ፣ ናጋራንቾታፕ ሻኬቲዳይሲኔ ሳሉዋፕ አዲዲ ዶቂዳ ካሂኔ ሃላቃይ ኑስ ኮሺስ። 27 ኢ ሃንኮ ካሂኔ ሃላቃታ ሜላ ኮይሮ ባ ናጋራ ጊሾ ካሊዲ አሳ ናጋራ ጊሾ ጋላስ ጋላስ ያርሾ ያርሻናው ኮሺና፣ ኢ ባና ያርሺዳ ዎዴ ዛሬሶና ኦጊን ኢሲ ቶሆ ባና ያርሺስ። 28 ሙሴ ሂጌይ ዳቡራንቾ አሳ ካሂኔ ሃላቃ አሊዲ ሹሜስ። ሺን ሂጊያፌ ጉዬ ዩዳ ጫቆ ቃላይ ሜሪናው ፖሎ ጊዲዳ ያሳ ናዓ ሹሚስ።

8

ዮሱሲ ኑ ካሂኔ ሃላቃ

1 ኑኒ ሃሳያ ጊታባይ ሄሳ። ሳሉዋን ኡባፌ ቦላ ያሳ አራታፕ ኡሻቻ ባጋን ኡቴዳ ሃይሳ ሜላ ካሂኔ ሃላቃይ ኑስ ዴዔስ። 2 ኢ አሳን ጊዶናሺን ጎዳን ኤቂዳ ቱማ ዱንካኒያን ያሳ ኬላን አሴስ።

3 ካሂኔ ሃላቃ ኡባይ ኢሞኔ ያርሾ ያርሻናው ሹሜቴስ። ሄሳ ጊሾ፣ ሃ ካሂኔይ ያርሻናው ኢሲባይ ዳናው ኮሺስ። 4 ሂጌይ ኪቴይሳዳ ያርሺያ ካሂኔቲ ዴዲያ ጊሾ ኪሪስቶሲ ሳዓን ዴዲያባ ጊዲያኮ ካሂኔ ጊዶና። 5 ኤንቲ ካሂኔቴላን አሊያ ዱንካኒይ ሳሎን ዴዴይሳስ ሌሚሶኔ ኩያ። ሙሴይ ዱንካኒያ ኤሲያ ዎዴ ያሳይ ኢያኮ፣ «ታኒ ኔና ዴሪያ ቦላ ቤሲዳ ሌሚሱዋ ካሳዳ አላ» ያጊስ። 6 ሺን ዮሱሲ ጊዶ ጊዲዲ ሲጌሊያ ጫቆይ፣ ኮይሮ ጫቁዋፕ አዲይሳዳ ኢ ኤኪዳ አሶይ ኤንታይሳፌ አዲስ። ሄሲ ኤቂዳይ አዲያ ጫቆ ቃላና።

7 ኮይሮ ጫቁዋን ባሊ ባይናባ ጊዲያኮ ናምዓንሶ ጫቆ ኮሺና።

8 ሺን ጎዳይ ኢያ ቦሪዲ፣ ሃይሳዳ ያጊስ።
«ታኒ ኢስራዔሌ አሳራኔ ዩሁዳ አሳራ
አራሳ ጫቆ ጫቂያ ዎዴይ ያና።

9 ሄ ጫቆይ ታ ኤንታ አዋታ ጊብዔ ቢታፌ ኩሺያ አይካዳ፣
ጎቻ ኬሲዳ ዎዴ ኤንታራ ጫቂዳ ጫቁዋ ሜላ ጊዶና።
ኤንቲ ታ ጫቁዋን አማኔቲቦና ጊሾ
ታኒ ኤንታ ዮጋ አጋስ ያጌስ ጎዳይ።

10 ሺን ሂዛፕ ጉዬ ኢስራዔሌ አሳራ
ታ ጫቃና ጫቆይ ሃይሳ ያጊስ ጎዳይ።

ታኒ ታ ሂጊያ ኤንታ ጉጊያን ዎላና፤
ኤንታ ዎዛናን ገፋና።

ታኒ ኤንታ ያሳ ጊዳና፤
ኤንቲካ ታ አሴ ጊዳና።

11 ኤንታፌ አኒካ ባ ሾሩዋ ዎይኮ ባ ኢሻ፥
(ጎዳ ኤራ) ያጊዲ ታግርሴና።

ኤንቲ ጉሳፌ ጊታ ጋካናው
ኡባይ ታና ኤራና።

12 ታኒ ኤንታ ናቁዋ አቶ ጋና፤
ኤንታ ናጋራ ዛራ ቆፒኪ» ያጌስ።

13 ያሳይ ሃ ጫቁዋ «አራሴ» ጊዲ ዩጊሼ ኮይሮይሳ ጋልዲሲስ።
ሂዛ፥ ጋልዳይኔ ጩጋይ ዳያ ዎዴይ ጋኪስ።

9

ሳሎ ጎይኖኔ ሳዓ ጎይኖ

1 ኮይሮ ጫቁዋስ ያሳ ጎይኒያ ዎጋይኔ ሳዓ ያሳ ኪሳይ ዴዔስ።

2 ዱንካኔይ ኤቂስ። ኢያን ያምፔ ዎሲያ ኮጫይ፥ ገርጴዛይኔ ጎዳ ሲንሳን ዎሲያ ኡይሳይ ዴዔስ፤ ሄ ቤሳይ ጌሻ ቤሳ ጌቱቱስ።

3 ናምዓንሶ ማጋራጃዋፌ ጉዩ ባጋራ ዴዒያ ቤሳይ ኡባፌ ጌሻ ቤሳ ጌቱቱስ። 4 ኢያ ጊዶን ኢግኔ ጩዩሲያ ዎርቃ ሳሂኔይኔ ዎርቃን ሜሼቲዳ ጫቆ ታቦቱይ ዴዔስ። ሄ ጫቆ ታቦቲያን ማናይ ዴዒያ ዎርቃ ገሮይ፥ አጪዳ አሮና ግምዓይኔ ሙሴ ሂጌይ ገፌቲዳ ናምዑ ሎቼ ሹቻቲ ዴዎሶና። 5 ሄ ታቦቲያፔ ቦላ ባጋራ አቶቴሳ ካማ ባንታ ቁፊያን ጌንሲያ ቦንቾ ኪሩቤቲ ዴዎሶና። ሺን ሃዒ ሄ ኡባ ቆንጪሲዲ አዳናው ዳንዳዎኮ።

6 ሃ ኡባይ ሃይሳዳ ጊጊዳፔ ጉዩ፥ ካሂኔቲ ኡባ ዎዴ ባንታ አሱዋ አሳናው ዱንካኒያስ ኮይሮ ኪፊሊያ ጌሎሶና። 7 ሺን ካሂኔ ሃላቃ ገላሊ ዱንካኒያስ ናምዓንሶ ኪፊሊያ ላይሳፌ ኢሲ ቶዎ ጌሌስ። ኢ ያ ጌሊሼ ባ ናጋራ ጊሾኔ አሳይ ኤሮና አሲዳ ናጋራ ጊሾ ሱላ ያርሾ ኤኮና ጌሌና። 8 ኮይሮ ዱንካኒይ ኤቂዲ ዴዒሺን፥ ኡባፌ ጌሻ ቤሳ ኤፊያ ኦጌይ ቡሮ ዶዩቲቦናይሳ ጌሻ አያናይ ሄሳን ኤሪሴስ።

9 ሄሲ ሃ ዎዲያስ ሌሚሶ፤ ያሳስ ኢሜቲያ ኢሞይኔ ያርሾይ ጎይኒያ ኡራ ካሃ ጌሻናው ዳንዳዎናይሳ ሃይሲ ቤሴስ። 10 ሄሳቲ

9:2 ኪሳ 26:1-30፤ 25:31-40 9:3 ኪሳ 26:31-33 9:4 ኪሳ 30:1-6፤
25:10-16፤ 16:33፤ ታይ 17:8-10፤ ኪሳ 25:16፤ ዛሬ 10:3-5 9:5 ኪሳ
25:18-22 9:6 ታይ 18:2-6 9:7 ሌዌ 16:2-34

ሙሳባ፣ ኡሻባኔ ዳማ ዳማ ሜቻ ዎጋታ አዴይሳታ። ኤንቲ አራሳ ዎጋይ ያና ጋካናው አሴቲያ ካሬ ባጋ ዎጋታ።

11 ሺን ኪሪስቶሲ ሃዲ ኑ ዴሚዳ ሎዎባታስ ካሂኔ ሃላቃ ጊዲዲ ዩስ። ኢ ጌሊዳ ዱንካኔይ ጊታኔ ፖሎ ጊዲዳይሳ። ሄ ዱንካኔይ አሳ ኩሼን አሴቲቤና ቃሲ ሃ አላሚያባ ጊዴና። 12 ኪሪስቶሲ ኡባፌ ጌሻ ቤሳ ጌሊያ ዎዴ ዴሻ ሱሲኔ ማራ ሱሲ ኤኪዲ ጌሊቤና። ሺን ሜሪና አቶቴሳ ኢማናው ባ ሱሳ ኤኪዲ ዛሬሶና ኦንን ኢሲ ቶሆ ጌሊስ። 13 ዴሻ ሱሳይኔ ኮርማ ሱሳይ፣ ፀጌቲዳ ኡሳ ቢዶይ፣ ቱኒዳ አሳ ቦላ ዳርጩቲዲ ኤንታና ጌሺያባ ጊዲኮ። 14 ሜሪና ጌሻ አያና ባጋራ ቦሬይ ባይና ያርሾ አሲዲ፣ ያሳስ ባና ኢሚዳ ኪሪስቶሳ ሱሳይ፣ ዴዎ ያሳ ጎይናና ሜላ ሃይቆ ካሌሲያ አሱዋፔ ኑ ካሃ ዋቲ አሲ ጌሼኔ?

15 ሄሳ ጊሾ፣ ዪጌቲዳይሳቲ ያሳይ ኢሚዳ ሜሪና ላታ ኤካና ሜላ ኪሪስቶሲ አራሳ ጫቁዋስ ጊዶ ጊዲዲ ሲጌሴይሳ ጊዲስ። ሄሲ ሃኒዳይ አሳይ ኮይሮ ጫቁዋፔ ጋርሳን ዴዲያ ዎዴ አሲዳ ናጋራፔ ኤንታና ዎዛናው ኢ ሃይቁዳይሳና።

16 ሂዛ፣ ኬኬይ ዴዲኮ፣ ሄ ኬኪዳ ኡራ ሃይቆይ ኤሬታናው ኮሼስ። 17 ኬኪዳ ኡራይ ሃይቁኮ ኢያ ኬኬይ ሚኒስ። ኬኪዳ ኡራይ ሃይቆና አቲኮ ኢያ ኬኬይ አሴና።

18 ሃሪ አቶሺን፣ ኮይሮ ጫቆይካ ሱሲ ባይና ሚኒቤና። 19 ሙሴይ ሃኒ ኪታ ኡባ አሳስ አዲዳፔ ጉዬ ማራ ሱሲኔ ዴሻ ሱሲ ሃሳራ ሃሳኪዲ፣ ዞዎ ዶርሳ ኢኪሴኔ ሂሶጴ ቦንጮ ኤኪዲ፣ ማፃፋ ቦላኔ አሳ ቦላ ዉርጊስ። 20 ሙሴይ አሳኮ፣ «ሂንቴ ናጋና ሜላ ያሳይ ኪቲዳ ሱሳ ጫቆይ ሃይሳ» ያጊስ። 21 ሄሳዳካ፣ ዱንካኒያ ቦላኔ አሲያ ሚሼ ኡባ ቦላ ሱሳ ዉርጊስ። 22 ቱማካ ሂጌይ ጌይሳዳ ጉሳባታፔ አቲን ኡባባይ ሱሳን ጌዩስ። ሱሲ ጉኮናሺን አቶቴሲ ባዋ።

ዩሱሳ ፖሎ ያርሹቴሳ

23 ሳሉዋባስ ሌሚሶ ጊዲዳይሳቲ ኡባይ ሜሄ ያርሾን ጌያናው ኮሼስ። ሺን ሳሎባቲ ባንታ ሁዴን ሄሳፌ አዲያ ያርሹዋን ጌያናው ኮሼስ።

24 ኪሪስቶሲ ቱማ ያሳ ኬሳስ ሌሚሶ ጊዲዳ፣ አሳ ኩሼን አሴቲዳ ኡባፌ ጌሻ ቤሳ ጌሊቤና። ሺን ኢ ሃዲ ኑ ጊሾ ያሳ ሲንሳን ቤንታናው ሳሉዋ ጌሊስ። 25 ካሂኔ ሃላቃይ ሳይሳን ሳይሳን ባ ሱሲ ጊዶናይሳ ኤኪዲ፣ ኡባፌ ጌሻ ቤሳ ጌሌስ። ሺን ኪሪስቶሲ ዳሮ ቶሆ ባና ያርሻናው ሳሎ ጌሊቤና። 26 ሄሳዳ ሃኒዳባ ጊዲያኮ፣

9:13 ሌዌ 16:15-16፣ ታይ 19:9፣ 17-19 9:19 ኬሳ 24:6-8 9:21 ሌዌ 8:15 9:22 ሌዌ 17:11

ኪሪስቶሲ አላሜይ ሜዴቶሳፔ ዶሚዲ ዳሮ ቶሆ ዋዩታናው ኮሼስ። ሺን ሃሲ ዎዲያ ውርሴሳን ናጋራ ዲጋናው ባና ያርሺዲ ዛሬሶና ኦጌን ኢሲ ቶሆ ቤንቲስ።

27 አሲ ኡባይ ኢሲ ቶሆ ሃይቃናው ሄሳፌ ጉዩ ፒርዴታናው ቤሴስ። 28 ሄሳዳካ፣ ኪሪስቶሲ ዳሮ አሳ ናጋራ ዲጋናው ኢሲ ቶሆ ያርሼቲስ። ሺን ኢ ናጋራ ቶካናው ጊዶናሺን ባና ናጌይሳታ አሻናው ናምግንሶ ቆንጫና።

10

1 ሙሴ ሂጌይ ያናው ዴዲያ ሎዎባታስ ኩያፔ አቲን ባ ሁዔን ዋና ጊዴና። ሄሳ ጊሾ፣ ላይሳን ላይሳን ፓጩይ ባይና ያርሼቲያ ያርሾይ ጎይናናው ሺቂያ አሳ ፖሎ አሳናው ዳንዳዔና። 2 ሂጌይ ኤንታ ፖሎ አሳናው ዳንዳዔዳባ ጊዲያኮ ኤንቲ ያርሾ ያርሼይሳ አጋናሺን። ቃሲ ጎይናናው ሺቂያ አሳይ ባንታ ናጋራፔ ጌያና፤ ኤንታ ካሃይካ ኤንታና ባላ ጊዲ ሞቴና። 3 ሺን ሄ ያርሾቲ ላይሳን ላይሳን ናጋራ ቆሬሶሶና። 4 አይስ ጊኮ፣ ኮርማ ሱሲኔ ዴሻ ሱሲ ናጋራ ዲጋናው ዳንዳዔና።

5 ሄሳ ጊሾ፣ ኪሪስቶሲ ሃ አላሜያ ዩዳ ዎዴ ሃይሳዳ ያጊስ። «ኔኒ ያርሾኔ ኢሞ ኮያባካ፤ ሺን ታው አሾ ጊጊሳዳሳ።

6 ኔኒ ፀጌቲያ ያርሾኔኔ ናጋራ ያርሹዋን ኡፋይታባካ።

7 ሄ ዎዴ «ታ ጊሾ ማግፋን ግፌቲዳይሳዳ፣ ጎዳው፣ ታኒ ኔ ሺኒያ አሳናው ያስ» ያጋስ።

8 ያርሾይ ያርሼታና ሜላ ሂጌይ ኪቲያባ ጊዲኮካ፣ ኪሪስቶሲ ኮይሮ፣ «ኔኒ ያርሾኔ ኢሞ፣ ፀጌቲያ ያርሾኔ ናጋራ ያርሾ ኮያባካ፤ ኤንታን ኡፋይታባካ» ያጊስ። 9 ካሊዲካ ኢ፣ «ጎዳው፣ ሄኮ ታኒ ኔ ሺኒያ አሳናው ያስ» ያጊስ። ሄሳ ጊሾ፣ ኪሪስቶሲ ናምግንሱዋ ኤሳናው ኮይሮይሳ ሻሪስ። 10 ዩሱስ ኪሪስቶሲ ያሳ ሺኒያ አሲዲ፣ ዛሬሶና ኦጌን ኢሲ ቶሆ ባ አሾዋ ያርሺዳ ጊሾ ኦኒ ጌዩዳ።

11 ካሂኔ ኡባይ፣ ናጋራ ዲጋናው ዳንዳዎና ሄ ያርሾታ ጋላስ ጋላስ ያርሺሼ ኤቂዲ ባ አሱዋ አሴስ። 12 ሺን ኪሪስቶሲ ኡባ ዎዴስ ጊዲያ ኢሲ ናጋራ ያርሹዋ ያርሺዲ፣ ያሳፌ ኡሻቻ ባጋን ኡቲስ። 13 ሄ ዎዲያፔ ዶሚዲ ኢያ ሞርኬቲ ኢያ ቶሆይ ዩዲያባ

9:28 ኢሳ 53:12 10:5 ማዝ 40:6-8 10:11 ኬሳ 29:38 10:12 ማዝ 110:1

አላና ጋካናው ናጌስ።¹⁴ ኢ. ዛሬላና አጌን ኢ.ሲ. ቶሆ ባና ያርሺዳ ያርሹዋን ጌሻታ ሜሪናው ፖሎ አሲስ።

15 ቃሲ ጌሻ አያናይ ኑስ ሃይሳ ማርካቴስ። ኮይሮ ሃይሳዳ ያጊስ።

16 «ሄ ጋላሳታፔ ጉዬ፥
ታኒ ኤንታራ ጫቂያ ጫቆይ ሃይሳ፡

ታኒ ታ ሂጊያ ኤንታ ቆፋን ዎላና፤
ኤንታ ዎዛናን ፃፋና»

ያጌስ።¹⁷ ካሊዲካ፥

«ታኒ ኤንታ ናጋራኔ
ኤንታ ኢ.ታ አሱዋ ዛራ ቆፒኬ»

ያጌስ።¹⁸ ሂዛ፥ ናጋሪ አቶ ጌቴቴዳፔ ጉዬ ናጋራስ ያርሼቴያ ያርሾ ኮሺና።

አኔ ያሳኮ ሺቆስ

19 ሂዛ፥ ታ ኢሻቶ፥ ኑኒ ዩሱሳ ሱላ ባጋራ ኡባፌ ጌሻ ቤሳ ጌላናው ኑስ ሚኖቴሲ ዴዔስ።²⁰ ኑ ጌላናይ ኪሪስቶሲ ባ ማጋራጃዋ፥ ሄሲካ ባ አሹዋ ባጋራ ኑስ ዶዬዳ አራሲኔ ዴያ ጊዲዳ አጊያና።²¹ ኑስ ያሳ ኬላ ቦላ ሹሜቴዳ ጊታ ካሂኔ ሃላቃይ ዴዔስ።²² ኑኒ ኢ.ታ ካሃፔ ጌያናው ኑ ዎዛና ዉርጌቴዲ፥ ኑ አሳቴላ ጊሎ ሃላን ሜጩቴዲ፥ ሱሬ ዎዛናኒኔ ፖሎ አማኖን ያሳኮ ሺቆስ።

23 ኑስ ኡፋይሳ ቃላ ኢሚዳ ያሳይ አማንቴዳይሳ ጊዲያ ጊሾ ኑ ማርካቴያ ኡፋይሳ ኡሻቺ ሃዲርሲ ጎና ሚንሲዲ አይኮስ።

24 ኢሶይ ኢሱዋ ሲቆሲኔ ሎያ አሶስ ዋቲ ዴንፊላኔኮ አኔ ቆፖስ።

25 ኢሶቲ ኢሶቲ ሜዜ አሲዲ ሺቆይሳ አጊዳይሳዳ ኑኒ ኢ.ሲ.ፌ ሺቆይሳ አጎኮ። ሺን ጎዳ ጋላሳይ ማታቴዳይሳ ሂንቴ ቤዒያ ጊሾ ሄሳ ካሴይሳፌ አሲዲ አሲቴ።

26 ኑኒ ቱማ ኤራቴላ ኤኪዳፔ ጉዬ ኤሪሼ ናጋራ አሲኮ፥ ሂዛፔ ኑ ናጋራ ጊሾ ያርሼታና ያርሾይ ባዋ።²⁷ ሺን ሂዛ አቴዳይ ያሺያ ፒርዳኔ ያሳ ዋርኬታ ፁጋናው ጊጊዳ ዎልቃማ ታማ።²⁸ ሙሴ ሂጊያ ኪቴቶና ኢጊዳ አኒካ ናምዑ ዎይኮ ሄቸ አሲ ኢያ ቦላ ማርካቴኮ ቃደይ ባይናሺን ሃይቆስ።²⁹ ያቲን፥ ያሳ ናዓ ካዲዳ ኡራይ፥ ባና ጌሺዳ ያሳ ጫቆ ሱላ ቱናባዳ ቆፒዳ ኡራይ፥ ቃሲ አዶ ኬሃቴላ አያና ጫዬዳ ኡራይ፥ አይ ሜላ ኢ.ታ ፒርዳ ኤካናው ቤሲያኮ አኔ ቆፒቴ።

10:16 ኤር 31:33 10:17 ኤር 31:34 10:22 ሌዌ 8:30፤ ሂዛ 36:25
10:27 ኢሳ 26:11 10:28 ዛሬ 17:6፤ 19:15 10:29 ኬሳ 24:8

30 ሂዛ፥ «ሃሎ ከሶይ ታባ፥ ታ ኩሼ ዛራና» ጊዳይሳ ኑ ኤሮስ። ቃሲካ፥ «ጎዳይ ባ አሳ ፐርዳና» ያጊስ። 31 ዴዎ ያሳ ኩሼን ኩንዴሲ ዳሮ ያሼስ።

32 ሂንቴው ያሳ ፖዶይ ፖዲዳፕ ጉዩ ሂንቴ ዳሮ ዋዩን፥ ጊታ ባዪን ጊንጨዳ ቤኒ ዎዲያ ቆፒቴ። 33 ኢሲ ኢሲ ቶሆ ሂንቴ አሳ ሲንሳን ጫዩቲዴታ፤ ጎዴቲዴታ፤ ኢሲ ኢሲ ቶሆ ሂሳ ሜላ ዋዩይ ጋኪዳ አሳራ ኢሲፌ ዋዩዴታ። 34 ቃሾን ዴዲያ አሳስካ ቃዴቲዴታ። ሂንቴው ሎዶኔ ዳዮና ሻሎይ ሳሎን ዴዴይሳ ሂንቴ ኤሪዳ ጊሾ ሂንቴ ሻሎይ ቦንቁቲያ ዎዴ ኡፋይሳን ዳንዳዲዴታ።

35 ሂሳ ጊሾ፥ ጊታ ዎዩቶይ ዴዲያ ሂንቴ ሚኖቴሳ ዩጎፊቴ። 36 ያሳ ሼኒያ ፖሊዲ፥ ኢ ሂንቴው ኢማና ጊዳ ኡፋይሳ ኤካና ጋካናው ጊንጫናው ኮሼስ። 37 ሂዛ፥ ጊሻ ማፃፋን፥

«ኢ፥ ያና ጊዳይሲ ያና፤ ጋምዔና።

38 ሺን ታ ጊሎይ፥ ታናን አማኔቲዲ ዳና፤

አኒካ ጉዩ ሲሚኮ ታና ኡፋይሴና»

ያጊስ። 39 ኑኒ አማኔቲዲ አቲያ አሳ ባጋፌ አቲን ጉዩ ሲሚዲ ዳያ አሳ ባጋ ጊዶኮ።

11

አማኖ

1 አማኖይ ጉሳይ፥ ዴማና ጊዲ ኡፋይሳን አማኔቲዲ ናጊያባኔ ኑ ቤዶናባ ቤዲያዳ አሌዲ ኤኪያባ። 2 ቤኒ አዋቲ አማኖን ያሳፌ ማርካቴሌ ኤኪዶሶና።

3 አላሜይ ያሳ ቃላን ሜዴቲዳይሳ ኑ አማኖን ኤሮስ። ቃሲ ቤንቴያባይ ቤንቶናባፕ ሜዴቲስ።

4 አቤሊ ቃዔላይሳፌ አዲያ ያርሾ ያሳስ ያርሺዳይ አማኖና። ያሳይ አቤላ ኢሙዋ ኡፋይቲዲ ኤኪዳ ዎዴ ኢ ጊሎ ጊዲዳይሳ ማርካቲስ። አቤሊ ሃሪ አቶሺን፥ ሃይቁዲካ ባ አማኑዋን ሃዲ ጋካናው አዴስ።

5 ሄኖኬይ ሃይቆና ሳሎ ቤዳይ አማኖና። ያሳይ ኢያ ኤኪዳ ጊሾ አኒካ ኢያ ቤዳናው ዳንዳዲቤና። ሄኖኬይ ሳሎ ኤኪታናፕ ሲንፌ ኢ ያሳ ኡፋይሴዳ አሲ ጊዴይሲ አዴቲስ። 6 አማኖይ ባይና አኒካ ያሳ ኡፋይሳናው ዳንዳዲና። ያሳኮ ያ አኒካ ያሳይ ዴዴይሳኔ ባና ኮዩይሳታስ ዎዩቶ ኢሜይሳ አማኖናው ኮሼስ።

7 ኖሄይ ቡሮ ቤንቶናባስ ያሳይ ኢያው አዲዳ ዎዴ ያሳስ ያዩዲ፥ ባናኔ ባ ሶ አሳ አሻናው አማኖን ማርካቤ ኬዲስ። ያቲዲ ባ

10:30 ዛሬ 32:35፣ 36 10:37 ኢብ 2:3-4 11:3 ሜዴ 1:1፣ ማክ 33:6፣ 9፣ ዮሃ 1:3 11:4 ሜዴ 4:3-10 11:5 ሜዴ 5:21-24

አማኑዋን አላሚያ ፐርዲዲ፣ አማኖን ቤንቲያ ሂሎቴሳ ያሳፌ ኤኪስ።

8 አብራሃሜይ ላታ አሲዲ ኤካና ቢታ ባና ሜላ ያሳይ ኢያ ሄጊዳ ዎዴ ሃሪ አቶሺን፣ ኢ አው ቢያኮ ኤርና ኢሂኮካ ኪቴቲዳይ አማኖና። 9 አብራሃሜይ ያሳይ ኢያው ኢማና ጊዳ ቢታን ቤቴ አሳዳ ዴዲዳይ አማኖና። ያሳይ ሄ ኢማና ጊዳይሳ ኢያራ ኢሲፌ ላታናው ዴዲያ ዩሳቃራኔ ያይቆባራ ዎላ ዱንካኔን ዴዲስ። 10 ኢ፣ ያሳይ ቆፐዲ ኬዲዳ ሃላ ባሶይ ዴዲያ ካታማ ናጌስ።

11 ሳራ ባ ሁዔን ጨሚዳባ ጊዲኮካ ኡፋይሲ ኢሚዳ ያሳይ አማኔቲዳይሳ ጊዴይሳ ኤሪዳ ጊሾ ቃንሳታናው ዎልቃ ዴሚዳይ አማኖና። 12 ሄሳ ጊሾ፣ ሃይቂዳ አሲ ዳኒያ ኢሲ አዲያፌ ሳሎ ዎሊንቶ ሜላኔ አባ ጋፃን ዴዲያ ታይቦይ ባይና ሻፌ ሜላ ዜሬሳይ ዩሌቲዶሶና።

13 ሄ አሳ ኡባይ ባንታው ጌቴቲዳ ኡፋይሳ ቃላ ኤኮና አማኖን ሃይቂዶሶና። ሺን ሃሆራ ሄሳ ቤዲዲ፣ ዴሚዳዳ አሲዲ፣ ኡፋይሳን ኤኪዶሶና። ቃሲ ኤንቲ ሳዓን ኢማሴኔ ቤቴ አሲ ጊዴይሳ ኤሪዶሶና። 14 ሄሳዳ ጊያ አሳይ ባንታ ቢታ ናጌይሳ ቆንጩን ቤሴስ። 15 ኤንቲ ሄ አጊዲ ኬዩዳ ቢታ ጉዬ ቆፐዳባ ጊዲያኮ ጉዬ ሲማናው ዳንዳዎሶና። 16 ሺን ሃዲ አዲ ሎዲያ ሳሎ ቢታ ላሞቶሶና። ሄሳ ጊሾ፣ ያሳይ ኤንታው ካታማ ጊጊሲዳ ጊሾ «ኤንታ ያሳ» ጌቴቲዲ ሄጌታናው ዩላቴና።

17 አብራሃሜይ ፓጩቲዳ ዎዴ ዩሳቃ ያርሺዳይ አማኖና። ሄ ኡፋይሳ ቃላ ኤኪዳ አብራሃሜይ ባ ኢሲ ናዓ ያርሻናው ጊጊስ።

18 ያሳይ አብራሃሜኮ፣ «ኔ ዜሬሳይ ዩሳቃ ባጋራ ሄጌታና» ያጊዲ አዲስ። 19 ያሳይ ሃይቆፔ ዴንሳናው ዳንዳዎይሳ አብራሃሜይ አማኒዳ ጊሾ ዩሳቃ ሃይቆፔ ፓዲ ዴንዲዳዳ አሲዲ ዛሪ ኤኪስ።

20 ዩሳቂ ዎዴፔ ሃናናባ ኤሪዲ ያይቆባኔ ኤሳቄ አንጂዳይ አማኖና።

21 ያይቆቢ ሃይቃና ሃኒሼ፣ ኢሲ ኢሲ ዮሴፋ ናይታ አንጂዳይኔ ጉፌ ቦላ ካቲዲ ጎይኒዳይ አማኖና።

22 ዮሴፌ ሃይቃናው ማቲዳ ዎዴ ኢስራዔሌ አሳይ ጊብዔፌ ኬያናይሳ አዲዳይኔ ባ ሜቄሳ አሳናባ ኤንታ ኪቲዳይ አማኖና።

11:7 ሜዴ 6:13-22 11:8 ሜዴ 12:1-5 11:9 ሜዴ 35:27 11:11 ሜዴ 18:11-14፣ 21:2 11:12 ሜዴ 15:5፣ 22:17፣ 32:12 11:13 ሜዴ 23:4፣ 1ታሪ 29:15፣ ማዝ 39:12 11:17 ሜዴ 22:1-14 11:18 ሜዴ 21:12 11:20 ሜዴ 27:27-29፣ 39-40 11:21 ሜዴ 47:3፣ 48:1-20 11:22 ሜዴ 50:24-25፣ ኪሳ 13:19

23 ሙሴይ ዩሌቲዳፔ ጉዩ ኢያ አያኔ ኢያ አዋይ ማላ ሎዎ ናዓ ጊዲዳይሳ ቤዒዲ ሄኸ አጌና ቆቲዳይ አማኖና፤ ኤንቲ ካዉዋ አዋጁዋ ያዩቦኮና።

24 ሙሴይ ዲጨዳፔ ጉዩ ጊብዔ ካዉዋ ናዔ ናዓ ጌቱታናይሳ ኢዲዳይ አማኖና። 25 ሙሴይ ናጋራን ጉሳ ዎዴስ ኡፋይታናፔ፣ ያሳ አሳራ ዋዩ ኤካናይሳ ዶሪስ። 26 ኢ ዎዴፔ ዴማና ዎይቱዋ ቲሺ አሲዲ ያሊዳ ጊሾ ጊብዔ ሻሉዋፔ አሲዲ ኪሪስቶሳ ጊሾ ቦራታናይሲ ዳሮ አዲያ ዱሬቴሲ ጊዲዳይሳ ኤሪስ።

27 ሙሴይ ካዉዋ ሃንቁዋ ያዮና፣ ጊብዔሬ ኪዩዳይ አማኖና። ቤንቶና ያሳ ቤዒዳ አሳዳ ሃኒዲ ባ ቆፋን ጌንጨሰ። 28 ሃይቆ ኤሂያ ኪታንቾዩ ኢስራዔል አሳ ባይራ ናይታ ዎዴና ሜላ ሙሴይ ፋሲካኔ ቡሳ ዉርዒሳ ዎጋ አሲዳይ አማኖና።

29 ኢስራዔል አሳይ ሜላ ቢታራ ሃሙቲያዳ ሃሙቲዲ፣ ዞዎ አባ ፒኒዳይ አማኖና። ሺን ጊብዔ አሳይ ጌላናው ፓጨ ቤዒሺን ሃሳይ ኤንታ ሚቲስ።

30 ኢስራዔል አሳይ ኢያርኮ ካታማ ሹቻ ዲርሳ ላፑን ጋላስ ዩዩዲ፣ ኩንዲሲዳይ አማኖና። 31 ላይሚያ ራዓባ ቢታ ዎቼይሳታ ሞኪዳ ጊሾ ኪቱቶና አሳራ ሃይቆና አቲዳይ አማኖና።

32 ሂዛ፣ ሃራ ታ አይ ጎ? ጌዲዮናባ፣ ባራቃባ፣ ሳምሶናባ፣ ዮፍታሄባ፣ ዳዊቲባ፣ ሳሙዔላባ፣ ቃሲ ናቤታባ አዳናው ታው ዎዴይ ጊዴና። 33 ኤንቲ አማኖን ካዎቴሳታ ያኒዶሶና፤ ዒሎቴሳን አይሲዶሶና፤ ያሳይ ኢማና ጊዳ ኡፋይሳ ኤኪዶሶና፤ ጋሞታ ዶና ጎርዲዶሶና፤ 34 ታማ ዎልቃ ቶይሲዶሶና፤ ሞርካታ ማሻሬ አቲዶሶና፤ ባንታ ዳቡራን ሚኒዶሶና፤ አላን ዎልቃማ ጊዲዶሶና፤ አላጋ ቶራ ጎዲዶሶና። 35 ማጫሳቲ ባንታ ሃይቂዳይሳቲ ሃይቆፔ ፓዒን ኤኪዶሶና።

ቃሲ ሃራቲ አዲያ ሃይቆፔ ዴንዱዋ ኤካናው ኮዩዲ ቃሹዋፔ ቢሌታናይሳ ኢዲዶሶና። 36 ሃራቲ አሳን ቦሬቲዲ ሊሶን ጋራሬቲዶሶና፤ ሃራቲ ሳንሳላታን ቃሹቲዲ ቃሹ ኬሳን ዩጌቲዶሶና። 37 ኤንቲ ቡቻን ጫዴቲዶሶና፤ ማጋዜን ናምዓ ኪዩዲ ጳልቁቲዶሶና፤ ፓጨቲዶሶና፤ ማሻን ሃይቂዶሶና፤ ኤንታው ኡባባይ ዳዩን ሜቶቲዶሶና። ዶርሳ ኢቴኔ ዴሻ ኢቴ

11:23 ኬሳ 1:22፤ 2:2 11:24 ኬሳ 2:10-12 11:28 ኬሳ 12:21-30
11:29 ኬሳ 14:21-31 11:30 ኢያ 6:12-21 11:31 ኢያ 2:1-21፤ 6:22-25
11:32 ሃራ 6:11-8:32፤ 4:6-5:31፤ 13:2-16፤ 11:1-12፤ 1ሳሙ 16:1፤ 1ካዎ
2:11፤ 1ሳሙ 1:1-25 11:33 ዳኔ 6:1-27 11:34 ዳኔ 3:1-30 11:35
1ካዎ 17:17-24፤ 2ካዎ 4:25-37 11:36 1ካዎ 22:26-27፤ 2ታሪ 18:25-26፤
ኤር 20:2፤ 37:15፤ 38:6

ማዲዲ ዩዩዶሶና። 38 ኤንታው ሃ አላሜይ ጊጎና ኢዲን ባዞ ቢታን፣ ዴሬ ቦላ፣ ጎንጎሎኒኔ አላ ጊዶን ዩዩዶሶና።

39 ያሳይ ኤንታ አማኑዋባ ማርካቲኮካ፣ ሄ ኡባይ ጌቲቲዳ ኡፋይሳ ቃላ ኤኪቦኮና። 40 ያሳይ ኑስ ሎዶባ ቆፒ ዎሲዳ ጊሾ ኤንቲ ኑኒ ባይና ፖሎ ጊዶኮና።

12

ያሳይ ኑስ አዋ

1 ሂዛ፣ ሻራዳ ኑ ዩሹዋን ዳሪዳ ሃይሳ ሜላ ማርካቲ ኑ ማታን ዴዲያ ጊሾ ኑና ጴቢያ ኡባኔ አይኪዲ ሃሪያ ናጋራ ዲጊዲ፣ ኑ ሲንሳን ዴዲያ ጋዴ ዎሳ ጌንጫን ዎዎስ። 2 ኑ አማኑዋስ አጌ ዶዩዳይሳኔ ኑ ወርሴሳ ፖሎዋኮ ኑና ጋሲያ ዩሱሳ ቦላ ኑ አይሬያ ዎሶስ። ዩሱሲ ዎዴፕ ዴዲያ ኡፋይሳ ጊሾ ማስቃሲያ ዋያ ዳንዳዲዲ፣ ዩላ ሃይቁዋ ካዲዲ፣ ያሳፌ ኡሻቻ ባጋን ኡቲስ።

3 ሂዛ፣ ሂንቴ ዶጪዲ ኡፋይሲ ቃንዎና ሜላ ናጋራንቾታ ኢፀዋ ዳንዳዲዳ ዩሱሳ ቆፒቴ። 4 ናጋራራ ዴዲያ ባዲያን ቡሮ ሱሱ ጉሳና ጋካናው ኤቁቲቤኬታ። 5 ያሳይ ባ ቃላን፣ ባ ናይታዳ ሂንቴና ዞሪዳይሳ ዶጊዴታ።

«ታ ናዓው፣ ያሳ ሴራ ሴቆፋ፤

ኢ ኔና ሴሪያ ዎዴ ኡፋይሲ ቃንዎፋ።

6 ጎዳይ ባ ዶሲያ ኡራ ሴሬስ፤

ቃሲ ባ ናዓዳ ኤኪያ ኡባ ጋራፌስ»

ያጌስ። 7 ያሳይ ሂንቴና ባ ናይታዳ ሴሪያ ዎዴ ጌንጪቴ፤ አዋይ ሴሮና ናዲ አኔ? 8 ያሳይ ባ ናይታ ኡባ ሴሬስ፤ ሂንቴ ሴሬቶና ኢዲኮ ቱማ ኢያ ናይታ ጊዶናሺን ባላኮ ናይታ። 9 ቃሲ ኑና ዩሊዳ ኑ አዋቲ ኑና ሴሮሶና፤ ኑካ ኤንታና ቦንቾስ። ያቲን፣ ኑኒ ኑ አያና አዋስ ዋኒዲ አሲ ሃሬቶኮ? 10 ሂዛ፣ ኑ አዋቲ ባንታው ሎዶ ዳኒዳ ሜላ ጉሳ ዎዴስ ኑና ሴሪዶሶና። ሺን ያሳይ ኑ ጎዓስ፣ ኑ ኢያ ጌሻቴላን ሻኬታና ሜላ ሴሬስ። 11 ኑኒ ሴሬቲያ ዎዴ ዩሎዩሲፕ አቲን ኡፋይሴና። ሺን ጉዩፕ ሴሬቴሳ ሜዜቲዳ አሳስ ሴራይ፣ ሳሮይ ኩሚዳ ሂሎቴሳ አይፌ አይፊሴስ።

ዞሬኔ ናጊሳ

12 ሂዛ፣ ሂንቴ አርጋጪዳ ቁሲያኔ ሂንቴ ዳቡሪዳ ጉልባታ ሚንሱቴ። 13 ዎቤይ ፓፃና ሜላፕ አቲን አሲ ሜቆና ሜላ ሂንቴ ቶሁዋስ ሱሬ አጌ ጊጊሲቴ።

11:37 2ታሪ 24:21 12:5 ኢዮ 5:17፤ ሌሚ 3:11-12 12:12 ኢሳ 35:3
12:13 ሌሚ 4:26

14 አሳ አብራ ሳሮ ዳናውኔ ጌሻቴላን ዳናው ሚኒቴ፤ ጌሻቴሲ ባይና አኒካ ጎዳ ቤዓናው ዳንዳዔና። 15 ሂንቴፌ አደሰካ ሦሳ አዶ ኬሃቴሳይ ፓጮናዳ፣ ቃሲ ጫዋ አይፌ አይፌዲ ዳሮ አሳ ቴኒሲያኔ ዳይሲያ ዜሬሳዳ ጊዶና ሜላ ናጌቴቴ። 16 ሂንቴ ጊዶን ሳይማቴያ አሲ ዎይኮ ኢሲ ቶሆ ሚያ ካሳስ ባ ባይራቴሳ ቶቺዲ ባይዚዳ ኤሳዌ ሜላ አሲ ዶና ሜላ ናጌቴቴ። 17 ጉዩፔ ኤሳዌይ ሄ አንጁዋ ኤካናው ኮዩዳ ዎዴ ዲጌቴዳይሳ ኤሬታ። ኢ ሄ አንጁዋ አፉሳን ሚኒዲ ኮይኮካ፣ ዴማናው ዳንዳዒቤና፤ ኢ ናጋራፔ ሲማናው ቃዳ ዴሚቤና።

18 ሂንቴ ኩሼን ቦሼቴያ ሲና ዴሪያኮ፣ ኤዳያ ታማኮ፣ ጳማኮ፣ ጫጋናኮ፣ ጎቴያኮ፣ 19 ዋይዚያ ዋሱዋኮ ዎይኮ ቃላይ ሲዔቴያ ቤሳኮ ዩቤኬታ። ሄ ቃላ ሲዒዳ አሳይ ሃራ ጉዣ ቃላ ሲዶና ሜላ ዎሲዶሶና። 20 አይስ ጊኮ፣ «ሃሪ አቶሺን፣ ዶዒ ሄ ዴሪያ ቦቺኮ፣ ሹቻን ጫዴቴዲ ሃይቆ» ያጊዳ ኪታ ኤንቴ ቶካናው ዳንዳዒባኮና። 21 ሄ ሃኒያባይ ዳሮ ዳጋንሲያባ ጊዲዳ ጊሾ ሙሴይ፣ «ታኒ ያሻን ኮኮራስ» ያጊስ።

22 ሺን ሂንቴ ዒዮኔ ዴሪያኮ፣ ዴዎ ሦሳይ ዴዒያ ዩሩሳላሚ ካታማኮ፣ ኢሲፌ ሺቂዲ አፋይቴያ ዳሮ ሙኩሉ ኪታንቾታኮ ሳሉዋ ዩዴታ። 23 ኤንታ ሱንሳይ ሳሎን ዓፌቴዳ ዎሳ ኬሳ ባይራ ናይታኮ፣ አሳ አብ ፒርዲያ ሦሳኮ፣ ፖሎ ጊዲዳ ዒሎ አሳ አያናታኮ ዩዴታ። 24 አራሳ ጫቁዋስ ጊዶ ጊዲዲ ሲጊሲያ ዩሱሳኮ፣ አቤላ ሱሳፌ አዲያባ አዲያ ዉርዔቴዳ ሱሳኮ ዩዴታ።

25 ሂንቴው አዲያ አራ ቃላ ኢዓስ ጎና ሜላ ናጌቴቴ። ካሴይሳቴ ሳዓን ጊዲዲ አዲያ ኪታ ሲዶና ኢዲዲ አቴቦናባ ጊዲኮ ያቴን፣ ሳሎን ጊዲዲ አዲያ ቃላ ኦኒ ኢዓስ ጊኮ ዋኒዲ አታኔ? 26 ሄ ዎዴ ኢያ ቃላይ ሳዓ ቃሲስ። ሺን ሃዒ ታኒ፣ «ሳዓ ዓላላ ጊዶናሺን ኢሲ ቶሆ ዛራዳ ሳሉዋካ ቃላና» ያጊስ። 27 «ኢሲ ቶሆ ዛራዳ» ጊያ ቃላይ ቃዎናባይ ሚኒዲ ዳና ሜላ ቃዒያ ሜዴቴዳባቴ ዳያናይሳ ቤሴስ።

28 ኦኒ ቃዓናው ዳንዳዎና ካዎቴሳ ኤኪያ ጊሾ ሦሳ ጋላቶስ፤ ሦሳ አፋይሲያ አጌን ቦንቾኒኔ ያሻቴላን ኢያ ጎይኖስ። 29 ሂዛ፣ ኦ ሦሳይ ቱማ ፀጊያ ታማ።

12:15 ዛሬ 29:18 12:16 ሜዴ 25:29-34 12:17 ሜዴ 27:30-40 12:18 ዛሬ 4:11-12፤ 5:22-27፤ ኬሳ 19:16-22፤ 20:18-21 12:20 ኬሳ 19:12-13
 12:21 ዛሬ 9:19 12:24 ሜዴ 4:10 12:25 ኬሳ 20:22 12:26 ሃጌ 2:6 12:29 ዛሬ 4:24

13

ወርሴሳ ዞሬ

1 አማኒያ አሳዳ ኢሶይ ኢሱዋራ ፖሎ ሲቆቴቱ። 2 ኢማሴ ሞኪይሳ ዶጎፕቴ። ኢሲ ኢሲ አሳቲ ሄሳዳ አሲሼ ኤሮና ኪታንቾታ ሞኪዶሶና። 3 ቃሾን ዴዲይሳታ ሂንቴካ ኤንታራ ኢሲፌ ቃሾን ዴዲያዳ አሲዲ ኤንታና ቆፕቴ። ዋዬ ኤኪያ አሳራ ኢሲፌ ሂንቴካ ዋዬ ኤኪያዳ አሲዲ ኤንታና ቆፕቴ።

4 ኤኮይኔ ጌሎይ አሳ ኡባ ማታን ቦንቼቲዳባ ጊዶ። ቃሲ ያሳይ ላይማቴይሳታኔ ላማይሳታ ፒርዳናው ዴዲያ ጊሾ አዚናይኔ ማቼያ ኢሶይ ኢሱዋስ አማኔታናው ቤሴስ።

5 ሚሼ ሲቆፕ ሂንቴና ናጊቴ፤ ሂንቴው ዴዲያባን አሊቴ። ያሳይ፣ «ታኒ ኔና ኡባራካ ዩጊኬ ዎይኮ አጊኬ» ያጊስ። 6 ሄሳ ጊሾ፣ ኮኒ አማኔቲዲ፣ «ጎዳይ ታና ማዴይሳ፤

ታ ያዩኬ፤ አሲ ታና አይ አሳኔ?» ያጎስ።

7 ያሳ ቃላ ኮይሮ ሂንቴው አዲዳ ሂንቴና ካሌሴይሳታ ቆፕቴ። ኤንቲ ዋኒዲ ዴዲዳኮ ኤንታ ዱሳ ቤዲዲ ኤንታ አማኮዋ ካሊቴ።

8 ዩሱስ ኪሪስቶሲ ዚኔካ ሃቺካ ሜሪናዉካ ላማቴና። 9 ዱማ ዱማ አራሳ ቲሚርቴን ሃራሶ ቢዲ ጳዮፕቴ፤ ቦፕቴ። ኑ ዎዛናይ ያሳ አዶ ኬሃቴሳን ሚናናው ቤሴስፕ አቲን ሚን ጎዶና ካሳን ዎጋ ፖሎን ጊዶፖ።

10 ሺን ዱንካኒያ ጊዶን አሲያ ካሂኔቲ ሄ ያርሾ ካሳፌ ማናው ኤንታው ማቲ ባይና ያርሾ ቤሳይ ኑስ ዴዲስ። 11 ካሂኔ ሃላቃይ ናጋራ ያርሾስ ሜሄ ሱሴ ኤኪዲ ያርሻናው ኡባፌ ጌሻ ቤሳ ጌሌስ። ሺን ሄ ሜሂያ አሹዋ ዲርሳፌ ካሬን ፀጌስ። 12 ሄሳዳካ፣ ዩሱሲ ዴሪያ ናጋራፕ ባ ሱሳን ጌሻናው ካታማ ፔንጊያፌ ካሬን ዋዩቲስ። 13 ሂዛ፣ ኮኒ ቦሪያ ቶኪዲ ዲርሳፌ ካሬ ኢያኮ ኬዮስ። 14 ሂዛ፣ ኮስ ሃይሳን ሜሪናው ዴዲያ ካታሚ ባዋ፣ ሺን ኮኒ ያና ካታማ ናጎስ።

15 ሂዛ፣ ዩሱሳ ባጋራ ኡባ ዎዴ ኢያ ሱንሳስ ማርካቲያ ሜቴርሻ ጋላታ ያርሾ ያሳስ ኢሞስ። 16 ሎዎባ አሶኔ ሂንቴው ዴዲያባፕ ሜቶቲዳ አሳስ ኢሞ ዶጎፕቴ። ሂዛ፣ ሄሳ ሜላ ያርሾይ ያሳ ኡፋይሴስ።

17 ሂንቴና ካሌሴይሳታስ ኪቴቲቴ፤ ኤንቲ ጊያባ አሊቴ። ኤንቲ ባንታ አሲያባስ ያሳ ሲንሳን አይሼታናው ዴዲያ ጊሾ ሂንቴና

13:2 ሜዴ 18:1-8፣ 19:1-3 13:5 ዛሬ 31:6፣ 8፣ ኢያ 1:5 13:6 ማዘ 118:6 13:11 ሌዌ 16:27

ሄሞሶና። ሂንቴ ኤንታው ኪቴቲኮ፣ ባንታ አሱዋ ኡፋይቲዲ አሳና፤ ሄሲ ሃኖና ኢቧኮ፣ ኤንቲ አዛኒሼ አሳና፤ ሄሲ ሂንቴና አይቢባካ ማዴና።

18 ኑስ ሦሳ ምሲቴ። ኑ ካሃይ ጌሺ፤ ኑ ኡባ ምዴ ሎሦባ አሳናው ኮኖስ። 19 ታኒ ሂንቴኮ ኤሌሳዳ ሦና ሜላ ሂንቴ ታው ሚንሲዲ ሦሳ ምሳና ሜላ ታ ሂንቴና ሃዳራ ጋይስ።

20 ሳሮቴሳ ሦሳይ፣ ዶርሳ ሄሚያ ኑ ጎዳ ዩሱሳ፣ ባ ሜሪና ጫቆ ሱሳን ሃይቆፕ ዴንሲዳይሲ፣ 21 ኢያ ሼኒያ አሳና ሜላ ሎሦባ ኡባን ኢ ሂንቴና ዳንጫሶ። ኢያ ኡፋይሲያባ ዩሱስ ኪሪስቶሳ ባጋራ ኑናን ሦሳይ አሶ። ዩሱስ ኪሪስቶሳ ባጋራ ሦሳስ ሜሪናፕ ሜሪና ጋካናው ቦንቾይ ጊዶ። አሚንጊ።

22 ታ ኢሻቶ፣ ታ ሃ ዳብዳቢያ ሂንቴው ቃንሳን ሃፊዳ ጊሾ ሂንቴ ታ ዞሪያ ሳሌቶና ኤካና ሜላ ታ ሂንቴና ምሳይስ።

23 ኑ ኢሻይ፣ ጊሞቲዮሲ ቃሾፕ ቢሌቲዳይሳ ኤሪቴ። ኢ ኤሌሲዲ ታኮ ዩኮ ታ ኢያራ ሂንቴና ባዳ ቤዓና።

24 ሂንቴና ካሌሴይሳታኔ አማኒያ ኡባ ሳሮ ጊቴ። ሃሌፕ ዩዳ አማኒያ አሳይ ሂንቴና ሳሮ ያጎሶና።

25 ሦሳ አዶ ኬሃቴሳይ ሂንቴ ኡባራ ጊዶ። አሚንጊ።

አራሳ ጫቁዋ ጎፋሉ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

